



Broj/Број: 01/2a-50-1-2-25/08  
Sarajevo/Сарајево, 22.4.2008.godine

## **ZAPISNIK**

### **25. sjednice Komisije za vanjske poslove Predstavničkog doma Parlamentarne skupštine Bosne i Hercegovine, održane 22.4.2008.**

Sjednici su, osim predsjedavajućeg Komisije Slavka Matića i privremenog sekretara Davorina Semenika, prisustvovali i članovi Komisije: Milica Marković, Sefer Halilović, Sadik Ahmetović i Husein Nanić. Sjednici su prisustvovali i predstavnici Misije OSCE-a kao posmatrači, i predstavnici resornih ministarstava: Senad Oprašić iz Ministarstva vanjske trgovine i ekonomskih odnosa BiH, zatim Zoran Šajinović iz Ministarstva odbrane BiH, Minka Smajović iz Ministarstva za ljudska prava i izbjeglice BiH, te predstavnik Ministarstva finansija i trezora BiH i Radomir Bogdanović iz Ministarstva vanjskih poslova BiH.

Odsustvo su najavili: Denis Bećirović, Azra Hadžiahmetović, Azra Alajbegović i Milorad Živković.

U uvodnom izlaganju, predsjedavajući Komisije pozdravio je sve prisutne, izvinio se zbog kašnjenja početka sjednice, te predložio da se promijeni redoslijed tačaka utvrđen prijedlogom dnevnog reda, tako da se 8. tačka razmatra kao 2., na molbu predstavnice resornog ministarstva Minke Smajović, što je jednoglasno prihvaćeno.

Za sjednicu je usvojen sljedeći

## **DNEVNI RED**

1. Usvajanje Zapisnika 24. sjednice Komisije;
2. Davanje saglasnosti za ratifikaciju Fakultativnog protokola uz Konvenciju protiv mučenja i drugih okrutnih, neljudskih ili ponižavajućih postupaka ili kažnjavanja, (resorno ministarstvo: Ministarstvo za ljudska prava i izbjeglice);
3. Davanje saglasnosti za ratifikaciju Ugovora o zajmu – Reorganizacija projekta obnove elektroenergetskog sistema između Bosne i Hercegovine i Evropske banke za obnovu i razvoj (resorno ministarstvo: Ministarstvo finansija i trezora BiH);
4. Davanje saglasnosti za ratifikaciju Sporazuma o kreditu između Bosne i Hercegovine, koju zastupa Ministarstvo finansija i trezora BiH, i Bank Austria Creditanstalt AG – Projekat rekonstrukcije i proširenja sistema vodosnabdijevanja u općini Posušje (resorno ministarstvo: Ministarstvo finansija i trezora BiH);
5. Davanje saglasnosti za ratifikaciju Ugovora o amandmanu kojim se vrše izmjene i dopune Ugovora o zajmu od 2. novembra 2000., amandmanima od 5. decembra 2001. i 23. februara 2004. godine između Bosne i Hercegovine i Evropske banke za obnovu i razvoj (resorno ministarstvo: Ministarstvo finansija i trezora BiH);
6. Davanje saglasnosti za ratifikaciju Okvirnog sporazuma između Bosne i Hercegovine i Evropske investicione banke kojim se reguliraju aktivnosti Evropske

investicione banke u Bosni i Hercegovini (resorno ministarstvo: Ministarstvo finansija i trezora BiH);

7. Davanje saglasnosti za ratifikaciju Konvencije o pristupu informacijama, učešću javnosti u odlučivanju i pristupu pravdi u pitanjima okoliša – Aarhus, Danska, 25.juni 1998. (resorno ministarstvo: Ministarstvo vanjske trgovine i ekonomskih odnosa BiH);
8. Davanje saglasnosti za ratifikaciju Sporazuma o saradnji u oblasti odbrane između Vijeća ministara BiH i Vlade Republike Grčke (resorno ministarstvo: Ministarstvo odbrane BiH);
9. Usvajanje Okvirnog plana aktivnosti Komisije za 2008. godinu.

#### **Ad. 1. Usvajanje Zapisnika 24. sjednice Komisije**

Zapisnik je usvojen jednoglasno, bez primjedbi.

#### **Ad. 2. Davanje saglasnosti za ratifikaciju Fakultativnog protokola uz Konvenciju protiv mučenja i drugih okrutnih, neljudskih ili ponižavajućih postupaka ili kažnjavanja (resorno ministarstvo: Ministarstvo za ljudska prava i izbjeglice BiH)**

Predsjedavajući Komisije Slavko Matić zamolio je gosp. Bogdanovića da, sa aspekta Ministarstva vanjskih poslova BiH, obrazloži i objasni svih sedam sporazuma koji su danas na dnevnom redu prije nego što predstavnik resornog ministarstva da svoje obrazloženje. Bogdanović je kratko dao obrazloženje tako što je rekao da su svi sporazumi prošli potrebnu zakonom predviđenu proceduru te predložio Komisiji da da pozitivno mišljenje na sve ugovore.

Nakon Bogdanovića, predstavnik resornog ministarstva dala je svoje obrazloženje o ovom sporazumu, nakon čega je bez rasprave saglasnost data jednoglasno.

#### **Ad. 3. Davanje saglasnosti za ratifikaciju Ugovora o zajmu – Reorganizacija projekta obnove elektroenergetskog sistema između Bosne i Hercegovine i Evropske banke za obnovu i razvoj (resorno ministarstvo: Ministarstvo finansija i trezora BiH)**

Predstavnik Ministarstva finansija i trezora BiH obrazložio je sva četiri sporazuma (tačke br. 3, 4, 5 i 6) nakon čega je predsjedavajući otvorio raspravu o drugoj tački dnevnog reda. Rasprave nije bilo, te je saglasnost za ratifikaciju data sa četiri glasa "za" i jednim "protiv".

#### **Ad. 4. Davanje saglasnosti za ratifikaciju Sporazuma o kreditu između Bosne i Hercegovine, koju zastupa Ministarstvo finansija i trezora BiH, i Bank Austria Creditanstalt AG – Projekat rekonstrukcije i proširenja sistema vodosnabdijevanja u općini Posušje (resorno ministarstvo: Ministarstvo finansija i trezora BiH)**

Bez rasprave, dato je pozitivno mišljenje za davanje saglasnosti za ratificiranje ovog sporazuma i to sa četiri glasa "za" i jednim "protiv".

#### **Ad. 5. Davanje saglasnosti za ratifikaciju Ugovora o amandmanu kojim se vrše izmjene i dopune Ugovora o zajmu od 2. novembra 2000., amandmanima od 5. decembra 2001. i 23. februara 2004. godine između Bosne i Hercegovine i Evropske banke za obnovu i razvoj (resorno ministarstvo: Ministarstvo finansija i trezora BiH)**

Predsjedavajući Komisije Slavko Matić otvorio je raspravu o ovoj tački dnevnog reda. Husein Nanić izrazio je zabrinutost zbog situacije koja inače postoji u BiH, a koja se tiče uspješnosti realizacije projekata za koje se uzimaju krediti uz garanciju BiH. Predstavnik

resornog ministarstva u potpunosti se saglasio s Nanićem te rekao da Ministarstvo finansija i trezora BiH nije direktno odgovorno za odnos korisnika prema kreditu, te da oni mogu samo apelirati. Nadležne entitetske strukture su primarno odgovorne, naravno skupa s korisnikom, naglasio je predstavnik resornog ministarstva. Nanić je dao primjer regionalne deponije u Unsko-sanskom kantonu i postavio pitanje da li je u redu da se to ravnodušno posmatra sa strane i samo evidentira. Predložio je da ovo bude jedna od tačaka dnevnog reda na nekoj od narednih sjednica. Predstavnik Ministarstva finansija i trezora BiH naglasio je da je ovo pitanje veoma kompleksno i da se ono tiče efikasnosti sistema koji Ministarstvo ne može izmijeniti. Prije nego što kredit bude odobren, postoje sve pretpostavke da će odnos korisnika biti zadovoljavajući. Istaknuo je važnost efikasnosti, ali Ministarstvo finansija i trezora BiH može nešto uraditi na vrlo blag i apelirajući način. Predsjedavajući Komisije pitao je da li je moguće dobiti relevantne informacije o efikasnosti utroška sredstava pribavljenih iz ovakvih kredita. Gospodin iz resornog ministarstva izjavio je da Ministarstvo finansija i trezora BiH može osigurati Komisiji takvu informaciju, jer ovo je unutrašnja stvar BiH, a ne samo Vijeća ministara BiH ili Ministarstva finansija i trezora BiH. Matić je predložio **zaključak** koji je jednoglasno usvojen: da se zatraži od Ministarstva finansija i trezora BiH informacija o projektima koji su u posljednje tri godine realizirani ili su još u fazi realizacije, putem kredita iz međunarodnih izvora, kao i o efektivnosti utroška ovih sredstava.

Nakon rasprave, saglasnost za ratificiranje ovog sporazuma data je jednoglasno, sa pet glasova "za".

**Ad. 6. Davanje saglasnosti za ratifikaciju Okvirnog sporazuma između Bosne i Hercegovine i Evropske investicione banke kojim se reguliraju aktivnosti Evropske investicione banke u Bosni i Hercegovini (resorno ministarstvo: Ministarstvo finansija i trezora BiH)**

Saglasnost je data jednoglasno, bez rasprave.

**Ad. 7. Davanje saglasnosti za ratifikaciju Konvencije o pristupu informacijama, učešću javnosti u odlučivanju i pristupu pravdi u pitanjima okoliša – Aarhus, Danska, 25.juni 1998. godine (resorno ministarstvo: Ministarstvo vanjske trgovine i ekonomskih odnosa BiH)**

Obrazloženje o ovom sporazumu dao je predstavnik resornog ministarstva dr. Senad Oprašić, a prije nego što je predsjedavajući Matić otvorio raspravu privremeni sekretar je upoznao prisutne sa sadržajem dokumenta "Participatorna demokratija i transparentna vlada: Instrumenti za zaštitu okoliša" koju je pripremio program Misije OSCE u BiH za parlamentarnu podršku koji zagovara prihvatanje ove konvencije, a koji je na sjednici podijeljen članovima Komisije. Rasprave nije bilo i saglasnost je data jednoglasno.

**Ad. 8. Davanje saglasnosti za ratifikaciju Sporazuma o saradnji u oblasti odbrane između Vijeća ministara BiH i Vlade Republike Grčke (resorno ministarstvo: Ministarstvo odbrane BiH)**

Obrazloženje o ovom sporazumu dao je predstavnik resornog ministarstva Zoran Šajinović, nakon čega je saglasnost za ratifikaciju data jednoglasno.

**Ad. 9. Usvajanje Okvirnog plana aktivnosti Komisije za 2008. godinu**

Poslije uvodnog govora predsjedavajući Slavko Matić otvara raspravu nakon čega je radni dokument Komisije usvojen jednoglasno uz dopunu o uzvratnoj posjeti Komisiji za vanjske poslove Sabora Republike Hrvatske.

Sjednica je završena u 15, 20 sati.

PRIVREMENI SEKRETAR

Davorin Semenik

PREDSJEDAVAJUĆI

Slavko Matić